



Asunto: alegacións á aprobación provisional da modificación puntual da RPT do Concello de Arzúa en relación co posto de técnico/a de normalización lingüística

Anxos Sobriño Pérez, como presidenta da Coordinadora de Traballadores/as de Normalización da Lingua (CTNL), con CIF G-15542897, enderezo postal no apartado de correos 170 de Santiago de Compostela, enderezo electrónico info@ctnl.gal e teléfono de contacto 629 571 950,

EXPOÑO:

De acordo con información que consta no Centro de Documentación Sociolingüística de Galicia (CDSG), o Concello de Arzúa contou cun **servizo de normalización lingüística (SNL)** dotado dun posto de **técnico/a de normalización lingüística en diversos períodos de tempo desde o ano 2000 ata actualidade**. O SNL non tivo a permanencia desexable para desenvolver un **traballo continuado de promoción do uso e prestixio da lingua**, pois só estivo activo en diferentes etapas que duraron entre varios meses e dous anos e medio, o período máis longo de actividade. É salientable que tamén formou agrupamento cos concellos de Boimorto e Sobrado durante 2016. Na actualidade conta cun SNL grazas a un contrato temporal de dous anos de duración.

O pasado **5 de novembro**, o Concello de Arzúa anunciou no *Boletín Oficial da Provincia da Coruña* a **aprobación inicial da modificación puntual da súa relación de postos de traballo (RPT)** e nela non se inclúe ningún posto de técnico/a de normalización lingüística.

De acordo co artigo 38 da [Lei 2/2015, do 29 de abril, do emprego público de Galicia](#), a relación de postos de traballo “é un instrumento técnico de carácter público que inclúe todos os postos de traballo de natureza funcional e laboral existentes en cada unha das administracións públicas”. A través deste documento as entidades “estructuran a súa organización, clasifican os postos de traballo existentes no seu ámbito e determinan o

seu contido para a súa selección e provisión, procurando organizar, racionalizar e ordenar o persoal co obxecto de facilitar unha eficaz prestación dos servizos públicos.”

As entidades locais de Galicia teñen entre as súas competencias a normalización lingüística, é dicir, a promoción do uso e o prestixio da lingua galega en todos os ámbitos de influencia da entidade. Así vén establecido na [Lei 3/1983, do 15 de xuño, de normalización lingüística](#), e tamén o [aclararon](#) recentemente a Dirección Xeral de Administración Local e a Secretaría Xeral de Política Lingüística, mediante a redacción e difusión do [Informe sobre a prestación do servizo de normalización lingüística pola Administración local en exercicio de competencia propia](#).

As ferramentas de traballo das administracións públicas para exercer as súas funcións son os **equipos técnicos especializados**, tanto no departamento de urbanismo ou no de servizos sociais como no de lingua. É imprescindible un departamento técnico ou SNL estable, dotado de persoal e orzamento suficiente, para analizar a situación da lingua na entidade local, no municipio ou na comarca, asesorar a entidade en política lingüística e para **planificar, xestionar, executar e avaliar accións e programas de normalización lingüística** que interveñan nas áreas prioritarias onde o galego perde prestixio ou utilidade. En definitiva, os servizos de normalización lingüística son necesarios para que os concellos poidan exercer de forma eficaz as súas competencias en normalización lingüística.

A recente modificación da relación de postos de traballo do Concello de Arzúa é unha **oportunidade para consolidar e dar continuidade ao servizo de normalización lingüística**, e así superar a inestabilidade que caracterizou este departamento nos últimos anos.

Polo tanto, SOLICITO:

- Que o **Concello de Arzúa inclúa na súa RPT unha praza de técnico/a de normalización lingüística**, pois é un posto técnico necesario para que o concello



exerza as súas competencias en normalización lingüística con eficacia e de forma permanente.

- Que se inclúan na **relación de funcións do posto de técnico/a de normalización lingüística** as que se enumeran no documento anexo, que ademais son as recollidas nas convocatorias de axudas para servizos de normalización lingüística que convocan anualmente a [Secretaría Xeral de Política Lingüística](#) e a [Deputación Provincial da Coruña](#).

Anexo: “Funcións dos servizos de normalización lingüística municipais”, documento presentado no Encontro de Política Lingüística Municipal, organizado pola CTNL e o Concello de Santiago de Compostela, que tivo lugar en Santiago de Compostela o 16 de novembro de 2015

Pontevedra, 27 de novembro de 2018